

Immikkoortoq 21-01 Ataatsimiititaliat katitigaanerani aaqqissusseqqinnermut Siumut ima oqaaseqaateqassaaq:

Kommunalbestyrelsep ileqqoreqqusaani §4 imm. 5 tunngavigalugu ataatsimiititaliat katitigaaneranni aaqqissusseqqinnissamut siunnersuut kommunalbestyrelsemut saqqummiutinnginnerani INUA-ni suliarineqaqqaarsimannginnera pissutigalugu, aammalu allannguutissanut tunngatillugu Ataatsimiititaliat tusarniarneqarsimanngimmata, ulluinnarnilu ingerlatsinermi kommunimi sulisut tusarniarneqarsimannginnerat pissutigalugu ataatsimiititaliat katitigaaneranni aaqqissusseqqinnissamut siunnersuut itigartillugu oqaaseqarfigaarput.

Suliap saqqummiunnerani Ataatsimiititaliat katitigaaneranni aaqqissusseqqinneq pineqarniarpoq. Ilangussat misissoraanni aqutsinermit ileqqoreqqusaq kommunalbestyrelsep ataatsimiinnerani ulloq 1. marts 2018-imi aammalu kingornatigut 15. marts 2019 akuerineqarsimasoq, Borgmester Ane Hansenimit aammalu pisortaanermit Hans Peter Poulsenimit atsiorneqarsimasoq takuneqarsinnaavoq, taannalu qallunaatuinnaq allataalluni nassiunneqarpoq kalaallisoortaa ilaangittoq maluginiarparput. Suliap saqqummiunnerani aqutsinermit ileqqoreqqusap allanngortinnissaa nassuiarneqanngilaq. Ileqqoreqqusaq allanngortinneqarnissaa suliap saqqummiunneqarnerani ersarissumik nassuiarneqartussaagaluarpoq.

Ataatsimiititaliat katitigaaneranni suliassaqarfiit assigiinngitsut ataatsimiititalianiit ataatsimiititalianut nuunnerisigut allannguiniarneq pineqarpoq. Ersarissumilli nassuiarneqarani ataatsimiititaliat katitigaaneranni suliassaqarfiit assigiinnitsut nussorneqarnerat ilutigalugu ataatsimiititaliat inuttalersugaanera ilanngullutik allanngussanersut. Suliap saqqummiunneqarnerani ataatsimiititaliat inuttalersugaaneri allanngussanersut ersarissumik aamma nassuiarneqartussaagaluarpoq.

Ataatsimiititaliat sususassaqarfiinut allannguiniarnernut tunngatillugu Ataatsimiititaliat aammalu partiini gruppit siulittaasui tamarmilluunniit allannguinnissamut tusarniarneqarsimanngillat, tamanna soorunalimi uggornartorujussuuvoq – partiit suleqatigittut akunnerminni iluminni namminneerlutik aaqqiisimarpasimmata. Kommunit aqunneqarnerat pillugu Inatsisartut inatsisaat nr. 29, 17. november 2017-imeersoq malillugu §1 imm. 2 malillugu Kommunalbestyrelsip kommunip aqunneqarnera, taamatuttooq borgmesterip suliassaqarfii, pillugit malittarisassat erseqqinnerusut aqutsinermit ileqqoreqqusami aalajangersassavai. Aqutsinermit ileqqoreqqusassamut taamatullu aqutsinermit ileqqoreqqusamut allannguutissatut siunnersuutit kommunalbestyrelsimit minnerpaamik ullunik 14-inik akuttussuseqartumik marloriarlugit suliarineqassapput. Taamaammat Siumumiit naatsorsuutigaarput ileqqoreqqusaq maanna oqaluuserisarput marloriarluni kommunalbestyrelsep ataatsimiinnerani oqaluuserineqassasoq paasivarput. Taassumallu tungaanut ataatsimiititaliat katitigaaneranni suliassaqarfiit assigiinngitsut inissaminiissorinangitsut isumatusaarluni isumaliutigeqqinneqassasut Siumumiit piumasarerusupparput. Tassami allannguinnissat saqqummiunneqartut taamatut isikkoqartillugit imminut illersorsinnaanngitsoq Siumumiit isumaqarpugut. Kommunip suliassaqarfiisa aaqqissugaanerat Ataatsimiititaliani susassaqartuni pingaarutilimmik inissisimapput, makkulu ippinnartoqartitagut erseqqissaavigerusuppagut:

Kommunip illuutaanik ingerlatsineq aamma aserfallatsaaliuineq (Inoqarfimmut nuussasoq siunnersuutigineqarpoq). Taava apererusunnarpoq Inoqarfimmi Ataatsimiititaliami ilaasortanik allannguisoqarniarpa? Ataatsimiititaliaq Inoqarfimmi ilaasortat ilaat kommunimi ulluinnarni illuutininik ingerlatsinermi akisussaasumik inissisimasoqarnera attuumassuteqarpallaartoqalersinnaaneralu eqqumaffigisariaqartoq Siumumiit isumaqarpugut. Suliassaqarfik taamatut nuunneqarpat Pisortat ingerlatsineranni suliassat suliarineqartarnerat pillugu Inatsisartut inatsisaat nr. 8, 13. juni 1994-imeersoq unioqqutinneqarsinnaaneranut aarlerinartoqalersinnaasoq Siumumiit erseqqissaatigerusupparput. Tassami

Suliami peqataasinnaanginneq (Inhabilitet) eqqarsaatigalugu § 3 malillugu kinaluunniit pisortatigut ingerlatsinermi suliaqartoq suliassami aalajangersimasumi peqataasinnaangilaq,

1) nammineq imminut eqqarsaatigaluni aningaasalluunniit eqqarsaatigalugit suliap qanoq inerneqarnissaanik soqutiginnilluinnartuuguni imaluunniit siusinnerusukkut suliami tassani kimulluunniit taamatut soqutiginnittumut sinniisuusimaguni.

Nunaqarfimmi aqutsisut kissaataat piviusunngortinniarlugit anguniarneqarpoq Illu Sullivik sulisullu innuttaasunik sullissisut ataatsimut INUA-ta ataaniilissasit. Najukkami sulisut innuttaasunullu qanitut sullissisut siunissami bychefimut attaveqartalissapput. Tamanna kissaat ilumut nunaqarfinni aqutsisut kissaatigisimaneraat takujuminaatsipparput, tassami nunaqarfinni aqutsisut massakkumut bychefimiit allaffissornikkut sullinneqareerput. Maangamut misilittagaalersut malillugit nunaqarfinni aqutsisut bychefiniit allaffissornikkut sullinneqarnertik kipiluttunartutut aammalu nukipparujuit atorlugit attaviginiartarneri nunaqarfinni aqutsisut misilittagaqarfigaat. Bychefit ataanni nunaqarfiit inissisimanerisa kinguneraat nunaqarfinni aqutsisut saaffiginnissutigisartagaat siunnersuutigisartagaallu suliareqqinneqaratik ingerlateqqinneqartannginneri. Siumumiit siunnersuutigerusupparput, aammalu siorna Kangaatsiami missingersuutit pillugit isumasioqatigiittoqarnerani nunaqarfiit sullinneqarnerat Inoqarfiup ataanut ilillugit allaffissornikkut sullinneqalissasut. Inoqarfimmi allaffimmiummik allamik saniatigut suliakkersugaanngitsumik nunaqarfilerisussamik atorfinitsitsinissaq missingersuutit pillugit isumasioqatigiittoqarnerani oqariartuutigineqartoq piviusunngortinneqartariaqartoq Siumumiit isumaqarpugut. Nunaqarfiit suliassartaat amerlasuut teknikkimut, sanaartornermut teknikkumullu attuumassuteqarmata Inoqarfiup ataaniinnissaat pissusissamisoorsorineruaput.

Islandimi periusaasup paasisassarsiorfiginissaa isumassarsiorfiginissaalu ilaattut isumaqatigiissutigineqartoq ersersinneqarpoq. Politikerit atorfilittallu peqataatinneqassapput. Siumumiit isumaqarpugut kommunitsinni qatserisartoqarfiit iluarseqqaarsimatinnagit Islandimut angalanissaq kingulliugallartariaqartoq, kommunitsinni aningaasat pingaarnersuinermi qatserisartoqarnermut atorneqarnissaat pingaarnerrugaluartoq isumaqaratta.

Inuussutissarsiutinik siuarsaaneq siunnersuinerlu aammalu Kommunimi inuussutissarsiutitigut aaqqissuussinerit Qeqertalik Business Councilimut kiffartuussinissamik isumaqatigiissut tunngavigalugu nuunniarneqarnerat isumaqataaffiginngilarput. Inuussutissarsiutinik siuarsaanerit politikikkut aaliangiiffigineqartussaajunnaarlugit Qeqertalik Business Councilimut nuutsinniarnearput. Inuussutissarsiutit ineriartortinneqarnerat uagut kommunalbestyrelsemi suliassagut isummerfissagullu kommunip suliffeqarfiutaanut namminersortutut ingerlasumut akisussaaffigitilissallugit pissusissamisuunngilaq. Qeqertalik Business Council namminerisamik ingerlasutut kommunitsinni inuussutissarsiutinik ineriartortitsinermik nammineerluni siunnersuisutut suliaqareerpoq, aaliangigassanulli pingaarutilinni inuussutissarsiutinik ineriartortitsineq eqqarsaatigalugu Qeqertalik Business Council aaliangiisinnaangilaq. Qeqertalik Business Council siunertaraa kommunalbestyrelsemut inuussutissarsiutinik siursaanissamut siunnersuinissaq. Taamaamat inuussutissarsiutit inerisarneqarnerat Inoqarfiup ataaniinnissaat kissaatigivarput.

MISI Timi Tarnip ataaniilerpat:

Kingullertigut Timi Tarni ataatsimiitarnitsinni illoqarfikkaartumik iliuusissatut pilersaarutit amigartumik suliarineqarsimanerat eqqarsaatigalugu, apererusunnarpoq Timi Tarnimi atorfilittat suliassaqarfimmik MISI-mik tigusinissaminut piareersimanersut? MISI Ataatsimiititaliaq Timi Tarnimut akisussaaffigitilernissaa pissusissamisoorsorinngilarput. MISI-p timersornerup, sunngiffiup, kulturip pitsaaliuinerullu suliassaqarfiup

ataaniilersinnaangilaq. MISI massakktut inissimatillugu Ataatsimiititaliaq Inuit-niiginnarnissaa kissaatigiviarput. MISI inatsisit ataani taaneqartut iluini suliassaqrpoq:

-Meeqqanut suli atualingitsunut perorsaaniikkut inerikkiartuutaasunik ulluunerani neqeroorutit pillugit Inatsisartut inatsissisaattut siunnersuut nr. 16, 3. december 2012-meersoq

-Atuarfik pillugu Inatsisartut inatsississaat nr. 15, 3. December 2012-imeersoq

-Meeqqat atuarianni immikkut atuartitsisarneq aamma allamik immikkut ittumik perorsaaniikkut ikiorsisarneq pillugit Namminersorlutik Oqartussat nalunaarutaat nr. 21, 8. december 2017-imeersoq

MISI inatsisitigut qulaani taakkartorneqartunut pisussaaffeqarnera pissutigalugu, imaaliinnarlugu meeqqerivinniit atuarianniillu avissaartillugu attuumassutaarutsinneqarsinnaangilaq. Aamma MISI sunngiffillu, pitsaaliuisut allallu attuumassuteqarfigilissappagit Timi Tarnimi atorfillit pitsaaliuisut allallu psykologiusaarlutik suliniarnerulernissaat ernumanartoqarsinnaasoq isumaqarpugut. MISI-ip pingaarnertut suliassaraa meeqqanut inuusuttunullu immikkut pisariaqartitsisunut sullissineq siunnersuinerlu. MISI allanik akisussaaffearpassuarnik suliakkersornagu meeqqat inuusuttullu sullinneqarnerat pingaarnarpaatillugu sulisariaqarpoq. Meerartagut inuusuttortagullu immikkut pisariaqartitsisut tamakkiisumik MISI-miit sullinneqarnissaminut pisariaqartitsisut arlaqarput. Apeqqutigerusunnarpoq MISI, Qaammaavik, GU-lu kattutsinniarneqarnerat suli ingerlanersoq? MISI, Qaammaavik, GU-lu suli kattutsinniarneqarpata aammalu MISI Timi Tarnillu ataaniilissappat Timi Tarnip inuttalersugaanera allangussanersoq ilanngullugu paaserusupparput, tassami qulaani nassuiaatigineqartut MISI, Qaammaavik, GU-lu kattutsinniarneqarpata Ataatsimiititaliami Timi Tarnimi ilaasortat ilaat Pisortat ingerlatsineranni suliassat suliarineqartarnerat pillugu Inatsisartut inatsisaat nr. 8, 13. juni 1994-imeersoq suliameq qataasinnaanginneq (Inhabilitet) unioqqutinneqarsinnaaneranut aarlerinartoqalersinnaasoq Siumumiit erseqqissaatigerusupparput. Aamma taamatut Qaammaavik Timi Tarnip ataaniilissappat Timi Tarnimi ilaasortaqrarpugut ilaasortaasinnaanera eqqarsarnartoqalersinnaasumik. Kommunit aqunneqarnerat pillugu Inatsisartut inatsisaat nr. 29, 17. november 2017-imeersoq malillugu § 40 Ataatsimiititaliami ilaasortaqrar kommunimi ingerlatsivimmik ataatsimiititaliamit pineqartumit qullersaaffigineqartumik akissarsiaqaatigalugu sulissussissanngitsoq erseqqissumik allaqqavoq. Taamatut erseqqissaavugut Pisortat ingerlatsineranni § 6. malillugu pisussaaffigigatsigu qisuariassalluta kialuunniit pissutsinik § 3, imm. 1-imi taaneqartunik pissuseqartumik ilisimannittup oqartussaaffimmi qullersarisani piaartumik tamatuminnaga nalunaarfigissavaa, erseqqilluinnangippat pissuserisat pingaaruteqanngitsuusut. Ingerlatsinermut oqartussaqaatigiinnut ilaasortat taamaattunik ilisimasaqarfigineqarpata tamakku oqartussaasunut nalunaarutigineqassapput. Imm. 2. Inuup suliameq qataasussaasorinanginnera taamaassorinanginneraluunniit oqartussaasunit imm. 1-imi taaneqartunit alajangiiffigineqassaaq.

MISI 2023-mi Aningaasanut inatsit aqqutigalugu 8,3 mio. kr. tikillugit aningaasaliiffigineqartarpoq, aningaasaliissutaasut MISI-mut qanoq atorneqartarnerisut kommunitisinni misissuiffigisariaqarput, tassami MISI-p ingerlanneqarneranut Aningaasanut inatsit aqqutigalugu Namminersorlutik Oqartussat aningaasaliisarput. Misilittagaareersullu qiviassagaanni Namminersorlutik Oqartussat suliniutinut aaliangersimasunut aningaasaliisimanertik siunertamut atorneqarsimanngikkaangata aningaasaleeqqikkumajunnaartarnerat takornartaangilaq. Taamaammatt MISI allanut suararpassuarnut taputartuunnagu siunertamut meeqqanut inuusuttunullu immikkut pisariaqartitsisunut sullissisariaqarpoq.

-18-imiit 30-nut ukiullit Timi Tarnimut Majoriaq ilanngullugu nuunneqarnissaat siunertaavoq. Tamanna ilanngussani aqutsinermut ileqqoreqqusami maluginiagassaavoq. Majoriaq massakktut Inoqarfimmiit allangortinnagu inissisimaannarnissaa Siumumiit piumasarivarput, tassami inuusuttut ilinniartinnut

ingerlaqqinnissaannut aqqutissiuunniarlugit siunnersorniarlugillu inuussutissarsiuutitigut qaammarsaanerit avaqqukkuminaammata. Majoriaq Inoqarfiup ataaniittariaqarpoq tassaalluunilu inuusuttut ilinniaqqiffinnut allanut inuussutissarsiuutinullu ingerlaqqinnissaminut alloriarfissaat.

Suliassaqarfiit ataaniittut Ikaartarfik/ Pissuseriffimmut nuussasut siunnersuutigineqarput:

-Piginnaangorsarnek, suliffimmik misiliineq aamma sulilersitsiniarneq

-Suliffeerunnermi ikiorsiissutit

-Aqqutissiuussisutut atuuffiit aammalu atualernissamut tunngasut

Siullermik apeqqutigeqqaarusupparput Ikaartarfik / Pissuseriffik sunaava? Ikaartarfik / Pissuseriffik pilersissallugu kommunalbestyrelsemi sulikuersinikuunngilagut. Taamaammat suliassaqarfiit qulaani taakkartorneqartut ullumikkutut inissisimatiinnarneqarnissaat kissaatigaarput Ikaartarfik / Pissuseriffik kommunalbestyrelsep maangamut sulikuersimanngisaanut suliassaqarfiit akisussaaffiliutsinneqaannarsinnaanngitsut isumaqaratta. Ikaartarfik / Pissuseriffik suliassaqarfiup suup iluaniinnersoq erseqqissumik nassuiarneqanngilaq. Aamma Ikaartarfik / Pissuseriffik suna toqqammavigalugu, inatsisillu suut malillugit suliaqarnerisooq tunngavilersorneqanngilaq.

Kommunalbestyrelsemi aaliangiinerit pereerpata Siumumiit ataani nassuiaatigineqartutut pisoqassasoq piumasaraarput:

Ataatsimiititaliat inuttalersugaaneri allanngortinneqarnissaat suliap saqqummiunnerani erseqqissaatigineqanngikkaluartoq, Kommunit aqunneqarnerat pillugu Inatsisartut inatsisaat nr. 29, 17. november 2017-imeersoq § 34 Imm. 3. toqqammavigalugu Ataatsimiititaliaqarnikkut aaqqissuussaanagerup allanngornerani kommunalbestyrelsimut ilaasortap ataatsip piumasarippagu, aningaasaqarnermut ataatsimiititaliami ataavartumillu ataatsimiititaliani tamani inissisiterisoqaaqqissasoq piumasarissuarput. Aamma inatsimmi pineqartumi §36. ataatsimiititalianut il.il. ilaasortassanik marlunnik amerlanerusunilluunniit qinersinermi qanoq amerlassuseqarneq (D'honts metode) tunngavigalugu qinersineq atorneqassaaq ataatsimiititalianut tamanut allaqqammat, Siumut maangamut ataatsimik Ataatsimiititaliani ataavartuni ilaasortaatiaqareerluni nuuttoqarnerata kingorna marlunnik ilaasortaataqalissammat, aammalu erseqqissaatigalutigu Ataatsimiititaliaq INUA-ni ilaasortat katillugit arfineq-marluusunit pingasut Siumumit inissarilissallutigit.